

جریدہ علمیہ

مشیتِ جلیلہ، اسلامیہ نمک، جریدہ، رسمِ سیدر

اوائل محرم ۱۳۳۳

عدو: ۷

آیدہ بر نشرِ اولنور

برنجی سنہ

« صورت خط هایون »



اشبو بیاننامه مک کافه اقطار اسلامیه و نشر و اعلاقی

اراده ایدرم ۴ محرم ۱۳۳۳ محمد رشاد

« بیاننامه » (*)

ملل و اقوام ایچون مواهب سبحانیه دن اولان نعم استقلالی احایه چالیشه رق بشریتی تحت اسارتہ آلمق ایستیان وعصر لر دن بری سعادت بشریه نک غدار بردشمن بی امانی اولان موسقوف حکومتنک شرق قریب و بعیدده حدوشنه سبیت و یردیکی مصائب دن بو دفعه مرکزی آوروپاده آزاده قالمیه رق اشتعال ایدن حرب عمومیده ملیونلرجه مسلمانی ربقه اسارتنده بولندیرمنی غرور ملیرینک اک آهنگدار ذوقی عد ایدن وشو حاکمیت ظالمه غیر مشروعه لرینک تحننده غصب حریت وتأمین منفعت کبی درلو درلوآمال خسیسه بسلین و بناء علیه عالم اسلامک نقطه استنادینی تشکیل ایلدیکی و اسلامیتک مدار قوامی بولندینی ایچون خلافت جلیله اسلامیه بی صارصمق و بو مقام عالی بی ممکن اولدینی قدر ضعفه اوغراتمق حسن کین آلودینی سینه لرندن بر آن آیرمیان انکلتیره و فرانسه حکومتلرینی ده کندیسنه پیرو قلمشدر .

ائتلاف ملثک نامنی طاشیان اشبو هیئت جباره کچن عصرده هندستانده کی آسیای وسطاده کی آفریقانک اکثر جهاتنده کی اقوام اسلامیه بی کافه حاکمیت و حکومتلرندن و حتی حریتلرندن محروم ابتدکلری کبی یارم عصری متجاوز بر زماندنبری یکدیگرینه ظهیر وله رق ممالک عثمانیه نک پک قیمتدار بر طاقم اقسامنی ضیاعه اوغراتمشلر و دها دون

(*) خط هایون ایله توشیح و امضای خلافتنهای ایله تزیین بیوریلان و بیک اوج یوز اوتوز اوج سنه هجریسی محرمنک ایکیتی جمعه ایرتسی کونی باب فتواده منعقد مجلس عالی علمی طرفندن تنظیم و امضا ایدلش اولان اشبو بیاننامه مسلمینک دعوت ایلدیکی جهاد علوی ، اسلامیتک دشمنی اولوب عداوتلرینی مقام خلافت اسلامیه به هجوم وصوللرله اظهار و اثبات ایدنلره قارشلی اولدینی و حکومت سنیه ایله بئتلرنده کی عهدده رعایت و ابراز آئارمودت ایلین دول سائره تبعه لرله متقابلاً حسن معاشرت اسلامک شعار عدل و مسالمتی ایجابندن بولندینی بیانیه مقام مشیخت اسلامیه به تعمیماً تبلیغ ایدلشدر .

دینه جک قدریقین برزمانده دخی قومشولر مزى تشجیع وحمایه ایدهرک وقوعه کتوردکلری
بالقان حربنده نیجه یوز بیک نفوس معصومه اسلامیه نك هدر اولسنه و بیکلرجه پاکدامن
مخدرات اسلامیه نك جوهر عصمتلرینک چاک چاک ایدلسنه و مقدسات جلیله اسلامیه نك
بازیجه هوسات اولسنه معناً و ماده سبب اولدقلری کی بو دفعهده بتون کره ارضی بر
محشر هیجا حالنه کتیره جک اولان هر نوع اختلاطانی التزامه و بو آتش جنک وجدالك
اك دلسوز شراره لرینی ینه قلبکاه امت محمد طوغری صاحبه باشلامشولر و ترتیبات
ملعنتکارانه لريله العیاذ بالله نور مین الهی بی اطفایه ساعی بولنشلردر «رِیْذُوْنَ اَنْ یُطْفِئُوْا
نُّوْرَ اللّٰهِ بِاَفْوَاهِهِمْ وَاِیَّابِی اللّٰهِ اِلَّا اَنْ یُّتِمَّ نُّوْرُهُ وَلَوْ کَرِهَ الْکَافِرُوْنَ»

قوت قادره و قدرت قاهره سنی ادرا کده عقول بشرک عاجز و قاصر بولندی
فرمانفرمای اکوان خدای ییچون عظیم الشانک سعادت دارین بشریت ایچون نور کزین
الهیسی اولان وصیانت جلیله صمدانیه سیله مبشر بولنان دین مین اسلامه قارشى اظهار
عداوت ایلاندرک ایرکچ غضب الهی به دوجار و معناً و ماده تارومار اوله جقلری درکار
اولوب خادم الحرمین الشریفین خلیفه مسلمین ایدالله بالنصر المین حضرتلری قره العیون
مؤمنین بولنان بیت الله الحرام و روضه مطهره فخر الانام ايله قدس شریفی ونجف و کربلا
ومرکز خلافت عیالی حاصلی مقامات انبیا مراقده اولیا منازل شهدا اولان بتون
دارالاسلامی مستعیناً بتوفیق الله شأمت تسلطدن صیانت و ناموس دین مینی شوائب
مذلتدن حمایت ایتمک واعلاء کلمه الله فریضه مهمه سنک باکال شہامت استکمال مقتضیاته
توسل ایلك اوزره عامه مسلمینی بوبابده کی فتاواى شریفه احکام منیفه سنه توفیقاً جهاد
عمومی به دعوت و سالف الذکر اعدای اسلامیتک قهر و تدمیری ایچون قهار ذو انتقام
اولان جناب منزل القرآنذن نیاز نصرت و عنایت ایلك خصوصی خلافت جلیله اسلامیه نك
اعظم وظائفدن بيلمشدر . مقام خلافت قلمرو حکومتنده بولنان تبعه عثمانیه نك یکر می
یاشندن قرق بش یاشنه قدر اولانلرینی بلا استثنا تحت سلاحه دعوت ایدرک بحوله تعالی
تجهیز ایلدیکی اردو و دونجای هایون ايله شمدی به قدر عمرلرینی نشر علمه وقف ایتمش
بولنان علما مدرسین و معلمین امید استقبال دین و ملت اولان بالعموم طلبه علوم و وفنون
ایله قسم اعظم مأمورین بیکس عالمه لرك شیخ فانی پدرلرك و والده لرك دستگیری اولان
شبان وطن بوکون پیدرپی مناطق جهاده تحشید ایدالمکه برابر بالعموم مؤمنین اشوجهاد

اکبردن حصه مند ثواب اولمق ایچون « اِنْفِرُوا خِفَافًا وَثِقَالًا وَجَاهِدُوا بِأَمْوَالِكُمْ وَأَنْفُسِكُمْ » حکمنه اتباعاً بدنأ و مالا جهاد ایتمک اوزره نفیر عام امرینی آلمشدر .

بنابرین قریم، قزان، ترکستان، بخارا، خیوه، هندستان کی حکومت ظالمة مذکوره نك قبضه تسلطلرنده بولان وچین و افغان و ایران ایله افریقاده وسائر اقطار ارضده متمکن اولان بالعموم مسلمینک علی قدر الاستطاعه اشوجهادا کبره بوبابده کی قتاوای شریفه مؤدا سنجه عثمانلیرله برابر مالا بدنأ اشترا که مسارعت ایدوب نستعید بالله: « يَا أَيُّهَا الَّذِينَ آمَنُوا مَالَكُمْ

إِذَا قِيلَ لَكُمْ انفِرُوا فِي سَبِيلِ اللَّهِ أَتَأْتِلُمْ إِلَى الْأَرْضِ أَرْضَيْتُمْ بِالْحَيَاةِ الدُّنْيَا مِنَ الْآخِرَةِ فَمَا تَتَّعِ الْحَيَاةِ الدُّنْيَا فِي الْآخِرَةِ إِلَّا قَلِيلٌ » و « اَلَّا تَتَّقِرُوا يُعَذِّبُكُمْ عَذَابًا أَلِيمًا وَيَسْتَبْدِلْ قَوْمًا غَيْرَكُمْ وَلَا تَضُرُّهُ شَيْئًا وَاللَّهُ عَلَى كُلِّ شَيْءٍ قَدِيرٌ » وَ « قُلْ إِنْ كَانَ آبَاؤُكُمْ وَأَبْنَاؤُكُمْ وَإِخْوَانُكُمْ وَأَزْوَاجُكُمْ وَعَشِيرَتُكُمْ وَأَمْوَالٌ اقْتَرَفْتُمُوهَا وَتِجَارَةٌ تَخْشَوْنَ كَسَادَهَا وَمَسَاكِنُ تَرْضَوْنَهَا أَحَبَّ إِلَيْكُمْ مِنَ اللَّهِ

وَرَسُولِهِ وَجِهَادٍ فِي سَبِيلِهِ فَتَرَبَّصُوا حَتَّى يَأْتِيَ اللَّهُ بِأَمْرِهِ » آیات کریمه لرینی تأمل ایدرک دنیا و آخرتده توجه ایده جک عذاب الیمدن تخلص کریبان و اکتساب سعادت جاودان ایلملری اک بیوک فرائض دینه لرندن هله بودشمنلرک زیر تابعیتلرنده کی اولاد مسلمینی تحت سلاحه آلوب خلیفه مسلمینک ویا معاون و متفقلرینک علیهنه سوق ایله شرق و غرب معرکه لرینک اک آتشبار منطقه لرنده اتلاف ایتدیرملری ده طوغریسی دین اسلام علیهنه اولان جنایتلرینی ینه اهل اسلام ایله یایمق خصوصنده بیک درلو احتیالات لثیمانه کوسترمه لری مؤمن قلبنک تحمل ایده میه جکی اک دلسوز بر بلوی اولمق ملابسه سیله شو قارعه مدهشه یه بر آن اول چاره ساز اولمق ایچون عالم اسلامک هر نوع فداکارلنی اقتحام ایتمی و بوبابده اک شدید اکر اهلره بیه متوکلا علی الله صبر ایلمی اقدم وظائف واهم عباداتنددر. دین مبین الهیسی نامنه جهاده شتابان اولان مسلمینی هر بر خصوصده مظهر فوز و نصرت بیوره جفی عنایت و الطاف جلیله صمدانیه دن موعود و شریعت غرای احمدیه نک اعلائی شانی ایچون فدای جان و مال ایلیان امت ناجیه سنه ظمیر و دستگیر اولمق ایچون روحانیت مقدسه نبویه حاضر و موجود در .

ای امت محمد :

« وَكَذَلِكَ جَعَلْنَاكُمْ أُمَّةً وَسَطًا لِتَكُونُوا شُهَدَاءَ عَلَى النَّاسِ وَيَكُونَ الرَّسُولُ

عَلَيْكُمْ شَهِيدًا » آیت جلیله سی حکمنجه دین مبین اسلامک سر تزولی ، سیر جمیله جناب رسالتابه اتباع ونوع انسانینک حائز اولدی لازمکلن فضائل و مزایای اکتساب ایله بین البشر نمونه امتثال اتخاذ اولنه حق بر امت فاضله تأسیسی اولدیغنه کوره مناسی وحدت وتوحید ، شعاری علم وعمل ، هدفی حق وسعادت بشر اولان بودین عالینک هانکی قوم هانکی اقلیمه هانکی حکومت منسوب اولور لسه اولسونلر کافه افرادی قلبری الله یوزلری کعبه الله متوجهاً لواء الحمد محمدی التده طوبیلاشم و ناصیه لرینه « إِيَّاكَ نَعْبُدُ وَإِيَّاكَ نَسْتَعِينُ » نشانه احتشامی یازلدیغدن دولای یالکزر حضور رب العالمینده سر نکون خضوع اولمش بر امت معظمه وحدانیه حائده یشاقلری و جامعه شوکتلرینه تعدی ایتمک ایستین اهل بغی و فساد دایماً « يَقَاتِلُونَ فِي سَبِيلِهِ صَفًّا كَأَنَّهُمْ بُنْيَانٌ مَرْصُورٌ » سیجای مهابتنی کوستیریورمک خصیصه سنه مالک بولملری ایجاب ایدر .

ای اللهک مطیع قوللری اولان مسلمانلر :

فلاح ونجات موحیدین ایچون جهاده کیدنلردن صاغ قالانلرک نصیبی سعادت ، عقبایه رحلت ایدنلرک رتبه سی شهادتدر . احیای حق یولنده فدای جان ایدنلرک وعد جلیل الهی موجبجه دنیاسی عزت ، عقابسی جنتدر . ای عزت وسعادت تشنه و دلداده وای اعلاهی حق یولنده بذل مال وجان ایدرک هر درلو مهالك و مخاطراته ، مجاهداته کوکس ویرمه آماده اولان مسلمانلر ایکی جهاند سعادتی بزم ایچون تقدیر ایتدیکنی قرآن کریمده وعد و تبشیر ایدن الله عظیم الشانک « وَأَعْتَصِمُوا بِحَبْلِ اللَّهِ جَمِيعًا وَلَا تَفَرَّقُوا » آیت جلیله سنده کی امر سبحانیسنه امتثالاً کوکل بر لکیله تخت عالی سلطنتک اطرافه طوبیلا نه رق وال بر لکیله کرسی معلاهی خلافتک ایاقلرینه صاریله رق بیلکزرکه دولتمز بوکون اسلامیتک عدوجانی اولان موسقوف ، انکلیز و فرانسز حکومتلری و متفقلریله محارب بولنیور . امیر المؤمنین وخلیفه مسلمین حضرتلری سزی جهاده دعوت ایدیور .

ای مجاهدین اسلام جناب حقک نصرت و عنایتی ونبی محترمزک مدد روحانیتیه

اعداد ديني قهر وتدمير وقلوب مسلميني سرمدى سعادتلرله تسيرير ايلكنز وعد جليل الهى ايله مؤيد ومبشر در .

قَاتِلُوهُمْ يُعَذِّبُهُمُ اللَّهُ بِأَيْدِيكُمْ وَيُخْزِيهِمْ وَيُنْصِرْكُمْ

عَلَيْهِمْ وَيَكْشِفِ صُدُورَ قَوْمٍ مُؤْمِنِينَ

صدق الله العظيم

شيخ الاسلام ومفتي الانام سابقا شيخ الاسلام ومفتي الانام
موسى طائفم ضياء الدين ضيرى

قاضى العسكر عطاه افندى زاده قاضى العسكر* امين الفتوى شيخ الاسلام ومفتي الانام سابقا
محمد شكرى عمر خلوصى على صير احمد

قاضى العسكر قاضى العسكر قاضى العسكر قاضى العسكر
نجم الدين محمد احمد مصطفى توفيق ابراهيم احمد

مستشار المشيخة الاسلامية اوليا زاده قاضى العسكر وامين الفتوى سابقا قاضى العسكر
ابراهيم اوليا عصمت توفيق محمود احمد

رئيس مجلس التدقيقات الشرعية وكيل الدرس الفاضل بدار الخلافة العلية
مسكين لامل على مصطفى رضا

السلطانية السلطانية السلطانية
المقرر الرابع للدرس بالحضرة المقرر الثالث للدرس بالحضرة المقرر الاول للدرس بالحضرة
طرنهولى نصوح افندى زاده

محمد هلمى مصطفى عاصم محمد اسرف
السلطانية السلطانية السلطانية

المقرر الثامن للدرس بالحضرة المقرر السادس للدرس بالحضرة المقرر الخامس للدرس بالحضرة
ايوب ابروسلى محمد الله ولدانه

مدير الاعلامات الشرعية رئيس المسودين رئيس مجلس المشايخ
على احمد احمد محمد احمد

مكتوبى المشيخة الاسلامية
ماردينى يوسف صدق افندى زاده
ابراهيم

* بالفعل — ١ سابقا فراشت شريفه وكيل — ٢ اظهى خواجه محمد افندى زاده اسبق مكتوبى مشيخت عليا —
٣ طربزونى — ٤ استانبولى — ٥ ترشيحي زاده احمد مختار افندى زاده اسبق عدليه ناظرى — ٦ سيدى شهرلى امين
افندى زاده شوراي دولت تنظيمات دائرهسى رئيسى — ٧ اوزونجه آباد خاصكويلى موسى افندى زاده .